

皇朝藩部要略

皇朝藩部要略卷之六

前史官壽陽

祁韻士

纂

寶山

毛嶽生

編次

江陰

宋景昌

校寫

平定

張 穆

覆審

外蒙古喀爾喀部要略四

七年

御題詩扇賜策凌札薩克圖汗格埒克延不勒卒子巴勒達爾新襲郡王爵來朝

諭曰札薩克圖汗號尙未承襲已召郡王巴勒達爾偕

原封札薩克圖汗策旺札布兄孫輔國公多岳特入覲朕思策旺札布身獲重譴兼乏子嗣而格塔克延不勒自襲汗以來効力軍營甚屬奮勉其子自應承襲况多岳特又非應襲汗號之人其札薩克圖汗仍著郡王巴勒達爾承襲尋授盟長車臣汗部札薩克輔國公車稜旺布以老罷子台吉格塔克襲

八年青袞咱卜以怠玩爲額駙策凌所劾

諭曰朕聞青袞咱卜凡事怠惰並不赴軍營效力去歲察閱所部防秋兵伊係副將軍所屬兵丁器械全不整飭又將伊本身開入軍營行走之列希圖雙俸經策凌

察出除名嚴行訓誠喀爾喀副將軍有統轄全部之責
爲眾蒙古表率豈可稍有怠玩苟且因諭策凌傳旨詢
問伊俯首無詞理應治罪但旣自知其罪姑行寬免飭
令嗣後加意奮勉效力贖罪

賜札薩克圖汗部一等台吉額琳沁公品級

命轄烏梁海降眾諸部扈

駕木蘭行圍

詔車臣汗部札薩克台吉貢楚克札布以兵五百赴庫
倫護視哲卜尊丹巴呼圖克圖貢楚克札布固魯札布
長子也尋以哲卜尊丹巴呼圖克圖擅赴額爾德尼昭

敦丹多爾濟未經勸阻

諭責之格埒克以解駝馬遲誤爲所部副將軍札薩克輔國公巴蘇所劾

詔削職子索諾木敦多布襲車臣汗部台吉旺札勒札布駐防鄂爾坤攜牲械濟兵

賜孔雀翎是年敦丹多爾濟卒弟敦多布多爾濟襲

九年車臣汗部多羅郡王貢格三丕勒卒貢格三丕勒車臣汗垂札布弟雍正末垂札布由札薩克郡王代車布登班珠爾爲車臣汗貢格三丕勒襲所遺札薩克郡王爵及垂札布子德木楚克襲札薩克郡王

詔貢格三丕勒仍爲郡王不兼札薩克至是理藩院議停襲

諭曰貢格三丕勒所授王爵本係額外加恩又未奮勉效力理應照議停襲但伊素係郡王今因身故遽爾削除朕心殊覺不忍著加恩授其子丹津爲多羅貝勒十年命土謝圖汗部札薩克和碩親王額璘沁多爾濟督理俄羅斯邊境事

十二年策凌入覲

優賚遣歸

授土謝圖汗部札薩克和碩親王額璘沁多爾濟所部

副將軍赴塔密爾駐防

十三年授土謝圖汗延不勒多爾濟爲盟長及所部副將軍偕哲卜尊丹巴呼圖克圖督理俄羅斯邊境事諭令諸部選配駝五百運歸化城米赴塔密爾軍營並留兵駐防尋延不勒多爾濟偕眾札薩克議軍營臺站爲護牧設兵糧業蒙恩賞至歲需牲畜願照數公捐無庸由收厥運送策凌代奏

允之厄魯特降人達什哈脫歸布拉罕札薩克一等台吉乾清門行走達什不勒擒之

詔賚幣并

賜戴孔雀翎札薩克圖汗巴勒達爾所屬有多爾濟者
匿厄魯特逃人察岱歲餘巴勒達爾始縛獻策凌劾其
不嚴緝賊罪

詔免議青袞咱卜請以其叔父公品級一等台吉額璘
沁別授札薩克

許之

詔授車臣汗部郡王德木楚克署盟長德木楚克垂札
布長子

十四年旺札勒札布捐貲造矢千送軍營并以羊四千
餘給兵

諭曰旺札勒札布前因屢助軍需授一等台吉今復備辦軍器協濟口糧感恩效力殊可嘉尚著加恩授札薩克烏梁海降人巴黨遁有烏勒木濟者馳告旺布多爾濟追至貢贊伯勒齊爾盡擒還理藩院議雖擒獲究因疏懈所致停敘功

上以旺布多爾濟聞信疾追奮勇可嘉

賜幣旺布多爾濟額璘沁子尋授二等台吉

十五年春二月額駙策凌薨訃至

上軫悼

諭曰定邊左副將軍固倫額駙喀爾喀大札薩克和碩

超勇親王策凌以名藩尙主班崇懿戚在
聖祖仁皇帝時卽已宣力邊陲勳猷茂著

世宗憲皇帝眷注優隆晉爵親王任專閫外身先血戰
殄靖狡寇偉績丕昭益勤忠盡朕以王爲兩朝勳舊倚
毗彌殷寄重長城倍加渥澤前聞遘疾遄命賜藥選醫
令伊次子車布登札布馳驛侍奉復遣乾清門侍衛德
山前往存問方期漸就痊可忽聞溘逝深爲軫惻著加
恩賜銀一萬兩治喪卽命德山往奠茶酒允伊遺奏合
穹固倫純愍公主園寢著伊長子成袞札布扶櫬來京
俟到京日朕親臨奠輶所有應行典禮俱照宗室親王

例考謚建碑具如儀式自昔功臣勳戚侑食廟庭以王之功宜配享

太廟雖蒙古親藩從未有與配享者朕以王功在王室名勒旗常簡在久孚宜膺特典且令眾蒙古知朕崇獎賢勞中外一體俾共知感奮益切勸勉并照和碩怡賢親王例崇祀賢良祠永垂秩祀以示朕酬庸展親優賢篤舊至意賜謚曰襄

御製七言詩悼之有不必讀書知大義每於臨陣冠三軍之句命成袞札布襲札薩克和碩親王兼授盟長策凌子八列譜者六長成袞札布次車布登札布封札薩

克郡王次蘇巴什里次札木禪多爾濟均封公品級次額琳沁多爾濟授一等台吉追封公品級六月

諭曰額駙超勇襄親王策凌爲國家竭誠宣力

世宗憲皇帝授以定邊左副將軍重任訓兵飭備準夷
懾服喀爾喀賴以甯謐實爲勳戚重臣不意溘逝所遺
缺甚屬緊要簡任務在得人成袞札布係伊長子前在
軍營懋著勞績才具實堪勝任雖此非世襲之職而因
才器使有所弗拘著授爲定邊左副將軍務益勵忠勤
勉成父志以副特簡毗任之意車臣汗部札薩克輔國
公巴蘇卒於塔密爾軍營

上念其宣力有年。

軫悼賜卹子達爾濟雅襲。

十六年三月成袞札布奏守汎弁兵私與界外回眾互市致爭請嚴鞠之。

詔勿株連嗣後嚴禁青袞咱卜坐縱屬私與準噶爾互市罪削爵。

諭曰青袞咱卜縱所屬人私出汎界與準噶爾回眾貿易以致潛居烏梁海甚屬疏懈且於特諭擒解之喇嘛札木闡尙未解到怯懦推諉深負朕恩著革副將軍及札薩克貝勒爵朕觀額琳沁人材出众著襲札薩克多

羅貝勒但念青袞咱卜係博貝長孫一旦全削朕心殊爲不忍著卽以額琳沁所遺公品級札薩克台吉職令其調補。

詔額琳沁議定烏梁海出入汎界例并飭禁所部越境與準噶爾及回眾私市授土謝圖汗部郡王成袞札布子齊巴克雅喇木不勒副盟長授賽因諾顏部親王達什特多札布次子德沁札布所部副將軍尋授副盟長九月回眾至伊都克汎仍乞市成袞札布檄守汎侍衛飭勿再至復遣土謝圖汗部札薩克車布登往驅之又至札薩克額木根牧乞市。

諭遣還授策凌次子車布登札布所部副將軍參贊。十七年三月賽因諾顏親王成袞札布率兵三千環屯塔密爾軍營。土謝圖汗部札薩克琳不勒多爾濟亦率兵駐防塔密爾。

詔授札薩克圖汗部貝勒額琳沁所部副將軍參贊。與汗巴勒達爾各以兵三千隨副都統達青阿駐防鄂爾海喀喇烏蘇車臣汗嘛呢巴達喇率所部兵四千駐防巴顏烏蘭賽因諾顏部親王德沁札布偕土謝圖汗部郡王齊巴克雅喇木不勒率兵千駐防錫喇烏蘇十二月成袞札布來朝奏每年鄂爾坤及烏里雅蘇台駐喀

爾喀防秋兵二千四部各有備用兵札薩克圖汗部一千
賽因諾顏部二千土謝圖汗部四千俱在游牧預備距
軍營近僅數日遠亦不過旬餘若盡調烏里雅蘇台糧
馬由各部派給將滋累請仍居本游牧聽調

從之成袞札布請析屬令其弟車布登札布自爲一旗
詔允其請

十八年達什不勒巴勒達爾德沁札布各獻駝馬助軍
並得紀錄授嘛呢巴達喇爲盟長

詔車臣汗部札薩克旺舒克達爾札長子貢楚克赴庫
倫駐防杜爾伯特台吉車凌車凌烏巴什車凌蒙克等

攜眾降成袞札布率車布登札布格埒克巴木不勒車
木楚克札布等各以兵千赴烏里雅蘇台防準噶爾追
兵有宰桑禡木特者引兵二百來追馳由巴顏珠爾克
博托和尼溝往揚言其部台吉噶爾藏多爾濟阿睦爾
撒納將至車木楚克札布偵知之遣報成袞札布發兵
援而自赴車凌車凌烏巴什所令速徙烏里雅蘇台車
凌蒙克後至復令由庫密固爾河入西爾哈瀚海以避
上諭勿縱禡木特還巢禡木特逸

嚴旨詰責

詔車木楚克札布偕沙克都爾札布等以兵二千赴卓

克索駐防。

賜雙眼孔崔翎賽因諾顏部札薩克輔國公巴圖蒙克偕同部鎮國公貢格敦丹等率兵千赴烏里雅蘇台駐防護杜爾伯特降眾達青阿檄諸部兵追緝擅入內汛之宰桑禡木特成袞札布檄額琳沁偕車臣汗部公格埒克巴木丕勒助之額琳沁以馬疲弗至禡木特逸成袞札布劾其逗留應削職。

諭曰額琳沁原係二等台吉朕因其人才出眾行走奮勉授一等台吉復賜公品級嗣因伊兄子青袞咱卜獲罪奪貝勒爵令額琳沁承襲伊自宜感激隆恩益加奮

勦乃奉將軍調遣託故不前理應治罪但念伊父博貝
舊有勞績仍賞公品級留軍效力其貝勒爵仍以青袞
咱卜襲之伊等若知朕恩效力自贖朕亦不究前愆否
則必重治其罪并有

詔責成袞札布及車木楚克札布飭偕達青阿擒賊自
效禡木特尋就擒復釋還札薩克圖汗部二等台吉達
什朋素克隨參贊大臣薩拉爾擒私入科布多汎之烏
梁海人札木闡等

獎賚幣尋偕賽因諾顏部貝勒沙克都爾札布等招降
札哈沁宰桑禡木特屬達什朋素克父圖巴以克爾森

齊老之役援剿不力削輔國公爵達什朋素克從軍數有功額駙策凌薦其才乃授台吉職

命車臣汗達瑪璘長子嘛呢巴達喇爲盟長

十九年正月

詔土謝圖汗札薩克郡王車稜拜都布赴烏里雅蘇台軍營齊巴克雅喇木不勒德沁札布等率錫喇烏蘇備調兵赴烏里雅蘇台附近駐防二月烏梁海人博羅特瑚圖克等擅入汎界土謝圖汗部札薩克輔國公巴木不勒多爾濟次子車登三不勒隨參贊大臣薩拉爾擒之有

詔獎諭薩拉爾遂由崆格進屯卓克索招撫烏梁海青
衰咱卜額琳沁等並率兵從旋追擒禡木特黨札木闢
等額琳沁尤奮厲薩拉爾以聞

詔封輔國公二月

諭成袞札布曰前因軍營無事額駙策凌年老就近以
塔密爾作爲軍營今有辦理烏梁海之事軍營應移駐
烏里雅蘇台以塔密爾作爲內地尋與尙書舒赫德議
防秋

詔來京面授方畧

三月以收撫烏梁海

詔桑齊多爾濟署所部副將軍偕車布登率諸部兵親隨成袞札布駐防鄂爾海喀喇烏蘇尋偕參贊大臣安崇阿德甯等移駐庫克嶺以車稜屬被賊劫又

詔達什不勒率兵五百往護之夏額璘沁多爾濟奉

詔購駝馬丹津督解由翁吉達什和碩解哈格札布堪
飼牧備用車臣汗部札薩克輔國公格埒克獻馬助軍
得紀錄同部台吉車稜多岳特獻馬五百助軍紀功晉
一等台吉車木楚克札布又購馬六千解軍馬用備足
命貢楚克札布解馬赴庫克納塔爾飼牧

命丹津督解駝馬至翁吉達什和碩四月罷成袞札布

定邊左副將軍職。

命赴額爾齊斯督屯田賽因諾顏部台吉齊旺多爾濟獻馬請從攻達瓦齊。

許之又念其前經獻駝馬助軍

賜公品級六月參贊大臣烏爾登調貢格敦丹赴察罕札拉烏魯格依諾爾駐防尋

召入

觀秋七月新降杜爾伯特台吉車稜蒙古巴朗攜眾由庫克嶺叛逃達什不勒率巴勒達爾兵追擒其餘黨車布登懼罪以追捕弗及奏

諭曰車布登與安崇阿德甯同駐庫克嶺專爲防範逃
眾乃巴朗從此脫逃伊等率兵尾追並不奮勇前進卽
行退歸安崇阿德甯二人著卽正典刑車布登削貝勒
爵降授貝子仍留軍營效力贖罪晉封達什不勒爲輔
國公又

諭曰達什不勒謾視杜爾伯特游牧甚爲妥協今一聞
巴朗逃遁卽率兵追斬餘黨奮勇出力朕甚嘉之著加
恩封輔國公以示獎勵

賜巴勒達爾冠服及幣

諭仍駐巴雅特輝特台吉阿睦爾撒納來降

詔琳丕勒多爾濟隨德沁札布移所攜降眾于塔密爾留兵防護尋由塔密爾移置固爾班舒魯克設汎防護檄貢楚克札布守塔密爾軍倉九月青袞咱卜土謝圖汗部札薩克台吉三都布多爾濟各以兵千隨參贊大臣努三等赴阿勒和碩偵烏梁海宰桑赤倫遁吹河乃率兵由喀喇莽奈直抵所居降其眾四百四十五戶徙所屬台吉班札喇克察於特斯偉袞安置之薩拉爾又率額琳沁車布登札布貢格敦丹車木楚克札布等剿撫烏梁海宰桑達克車根等于察罕烏蘇尋復擊宰桑禡木特及通禡木特降之既命額琳沁率兵二百赴圖

蘇爾勒軍營聽調。

命車木楚克札布隨參贊大臣烏爾登赴塔本托羅海駐防。

召貢克敦丹入

覲十月班第奏貢格敦丹從努三駐防齊克諾爾請緩覲期。

允之敘功得紀錄并賚幣十一月敘功晉封青袞咱卜郡王品級復授所部副將軍札薩克圖汗部札薩克台吉根敦由塔密爾移駐哈喇阿濟爾罕。

授土謝圖汗部札薩克額璘沁多爾濟爲西路參贊大

臣

二十年正月大軍進剿準噶爾達瓦齊分西北兩路以班第爲定北將軍阿睦爾撒納爲定邊左副將軍副之陝督永壽爲定西將軍薩拉爾爲定邊右副將軍副之格塔克巴木丕勒督解駝馬悞遲班第劾奏

詔削副將軍及輔國公爵從軍贖罪札薩克台吉成袞札布由烏里雅蘇台赴阿嚕博爾濟巴顏濟嚕克督解駝馬

獎賜佩飾賽因諾額部札薩克台吉賚充札布捐馬助軍

命赴科布多督牧務車稜多岳特獻馬六百牛百羊千濟軍

詔封札薩克輔國公二月成袞札布請隨征

詔暫駐烏里雅蘇台俟大軍行偕護軍統領塔爾瑪善往督屯田時軍營所用馬由喀爾喀購未至成袞札布恐後期檄由烏里雅蘇台督解科布多札薩克圖汗部輔國公多岳特私攜所解馬歸牧

詔削爵仍解馬贖罪三月將軍班第率大軍赴伊犁青袞咱卜引兵先進

賜三眼孔雀翎烏里雅蘇台辦事大臣哈達哈檄根敦

選兵五百分巡海喇圖庫列圖哈道里科布多布延圖等處與駐防烏哈爾和碩之公品級諾爾布札布互爲聲援巴雅爾什第偕賽因諾顏部札薩克輔國公巴圖蒙克將駐防烏里雅蘇台兵三千爲伊犁大軍聲援有急則繼進尋馳兵二百降穆哈賚得秦七十戶

賜幣及佩飾巴圖蒙克旋以疾卒于軍子丹巴旌準襲額琳沁從征行至松樹塘病卒

論曰額琳沁所封輔國公原非應襲之爵但念伊雖未至軍營中途溘逝亦屬可憫著加恩以其子旺布多爾濟襲時旺布多爾濟隨永常在西路軍先行桑齋多爾濟

濟等率輕騎繼進。車木楚克札勒由巴里坤至珠勒格圖。偕杜爾伯特公瑪什巴圖等以兵三百前行。擒準噶爾宰桑伊勒巴爾屬復奉薩拉爾檄偕阿拉善貝勒羅卜藏多爾濟杜爾伯特貝勒色布騰益兵七百招降札哈沁宰桑敦多布布魯古特台吉諾海奇齊克輝特台吉敦博勒達克噶勒雜特宰桑哈薩克錫喇等謀達瓦齊居格登阻伊犁河疾引兵由博羅塔拉赴哈塔濟勒渡車布登札布亦偕台吉達什由察罕呼濟爾至集賽擒宰桑齊巴漢以三百騎疾馳至遂奪其舟渡大軍合兵進擊達瓦齊遁諸將分路追捕獨車布登札布率同

部兵追至沙喇雅爾嶺而還。四月，成袞札布屯田兵由額爾齊斯移駐伊蘇圖鏗格爾。七月，班師。屯田兵撤還，尋烏什阿奇木伯克霍集斯擒獻達瓦齊、阿睦爾撒納、偕副都統額爾登額以兵五百由穆色爾嶺往取械達瓦齊詣軍，青袞咱卜、偕賽因諾顏郡王納木札勒齊素、薩、曉等收達瓦齊游牧，獲其孥屬並喇嘛六千餘。阿睦爾撒納謀據伊犁，潛與其黨納噶察、貽書哈薩克汗阿布賚、詭言統領蒙古漢兵駐伊犁。車布登札布責納噶察曰：爾等匿奉天子命，反若自統兵至可乎？納噶察不從。車布登札布

天子命，反若自統兵至可乎？納噶察不從。車布登札布

告班第飭易書且密陳阿睦爾撒納擅奪宰桑鄂勒錫
駝馬籍稱防禦哈薩克及布魯特私調兵九千駐各路
諸狃悖狀班第具以

聞蓋阿睦爾撒納謀逆同事者多不之察獨車布登札
布發其奸頃之

詔偕其兄齊木庫爾等入

觀班第由尼楚袞軍營遣額璘沁多爾濟等護之行齊
木庫爾窺阿睦爾撒納叛跡已著密勸額璘沁多爾濟
擒之弗從行至烏隆口以將軍印授護行稱歸牧治裝
額璘沁多爾濟信之遣琳丕勒多爾濟從二十餘騎送

歸至察罕郭勒阿睦爾撒納麾所部兵三百還攻琳丕
勒多爾濟等被圍拔矢還射奮勇鬪賊不敢逼奪路走
歸遇其後隊邀擊之獲阿睦爾撒納所用旗纛甲冑賊
遂由額爾齊斯河馳遁額璘沁多爾濟追之不及時桑
齊多爾濟攜索倫札哈沁兵千自伊犁還卽馳赴額爾
齊斯收將軍印擒賊黨阿喀察定進等檄沿途汎兵護
軍需并防新降厄魯特眾三都布多爾濟以督辦軍需
駐烏里雅蘇台聞叛隨駐劄大臣阿蘭泰等馳赴札布
堪擒阿逆孥及其黨班珠爾札木禪等時固爾班和卓
等賊眾千餘戶潛通烏梁海誘同逃大軍猝與遇分路

掩擊盡誅之先是

上預知阿逆中途必叛

密諭班第選軍中威望大臣監送班第奏額璘沁多爾濟老成可任

上以其人小有才不更事

飭諭班第至是果償事

諭曰逆賊阿睦爾撒納已叛遁額璘沁多爾濟率兵追捕量亦無濟著與齊木庫爾等遄行入

覲及至議削爵論斬

諭曰額璘沁多爾濟以札薩克親王參贊大臣膺監送

阿睦爾撒納之任齊木庫爾以逆謀既著勸速擒治乃恬不知警反以彼雙親王我單親王不敢便宜從事爲辭致逆賊免脫夫旣爲國家叛賊尙何雙親王之足論且逆賊公然授印率眾徑行何至逾日始遁去領兵追捕業已無及試思此何等事而有心貽悞至此其心尙可問乎核其情罪萬無可逭但念乃祖乃父夙著勤勞朕尙不忍加以顯戮令其自盡于是停襲王爵

詔獎琳不勒多爾濟之勇封輔國公

賜孔雀翎并

賚白金授三都布多爾濟公品級

晉桑齋多爾濟親王爵

諭曰桑齋多爾濟以一少年奮勇效力甚屬可嘉其祖丹津多爾濟本係親王著加恩晉襲原爵以車布登札布先發逆謀晉封多羅貝勒班第之剿達瓦齊于伊犁也道出阿爾台以烏梁海潛附準噶爾遣車布登沿途剿捕至固爾班鼐塔克及烏蘭布拉克喀喇哈巴地遇烏梁海副都統察達克屬得木齊綽罕宰桑圖布慎屬得木齊喀喇曼濟等眾盡降之並獲巴朗從賊二百餘戶師旋車布登偕副都統敦多卜率兵三百由薩噶勒巴什嶺往收汗烏梁海汗卽烏梁海所居地也宰桑郭

爾卓輝鄂木布及布魯古特宰桑根都什特楞古特宰桑瓜齊楞皆率眾降青袞咱卜又招降宰桑齊巴漢等自是烏梁海地畧定編新降旗分補授總管以青袞咱卜習烏梁海情

命總轄之先是巴朗叛逃青袞咱卜追至和通鄂博率兵還言巴朗由西路額琳哈畢爾噶遁故追不及至是巴朗就擒青袞咱卜言盡妄

諭責之五月副都統齊旺侍衛圖倫楚納木札勒齊素囉各以兵追緝叛賊巴朗就擒札薩克圖汗部台吉齊巴克札布偕宰桑烏勒木濟械送京師

賜孔雀翎尋赴烏里雅蘇台聽調阿逆黨克什木巴蘇
泰都噶爾擾伊犁班第遇害車稜拜都布旺沁札布貢
格敦丹擊之弗克車稜拜都布旺沁札布皆陣歿土謝
圖郡王齊巴克雅喇木丕勒方由烏蘭呼濟爾運軍糧
馳援力戰被執不屈格埒克巴不木勒車布登齋敕往
諭噶爾眾被創亦爲所留札薩克圖汗部輔國公多爾
濟車登賽因諾顏部協理台吉多爾濟均被執多爾濟
車登脫歸多爾濟留養於宰桑托克托博羅特家有達
瓦藏布者阿逆族也邀于路復執之去或言已降賊
命削爵嚴緝治罪時定西將軍策楞引大軍復赴伊犁

貢格敦丹突圖出偕協理台吉博爾綽對由珠勒都斯問道至軍

上念喀爾喀諸札薩克隨班第留駐伊犁猝遇叛賊以兵寡被圍

詔策楞傳旨慰諭令歸游牧示恤貢格敦丹跪言世受國恩無可圖報願擊賊自效策楞代奏

許之尋烏梁海逆賊戕守汎侍衛貝多爾時齊巴克札布率兵駐防奇爾吉斯諾爾卽偕根敦往捕至察罕烏蘇遇青袞咱卜自伊犁歸與合兵赴巴斯庫斯收撫烏梁海時舊屬準噶爾之烏梁海散居汗哈屯等處青袞

咱卜宣揚

上命於是宰桑哈爾瑪什瑪濟岱納木札勒保袞莽噶拉克納穆克布珠庫鄂木等相繼降敘功車布登封多羅貝勒齊巴克札布公品級

授德木楚克所部副將軍偕副都統納木札勒由塔密爾徙輝特和碩特降眾于固爾班舒魯克防護之八月阿逆煽包沁部眾總管阿克珠勒副總管台拉克和濟木呼哩等叛應之由索勒畢烏拉克沁踰阿爾台掠首汛侍衛齊徹布台吉達瑪琳等牧產成袞札布檄貢格敦丹以兵四百赴哈達青吉勒與協理台吉圖巴札布

察哈爾叅領博碩郭勒等追擊之駐臺大臣阿蘭泰檄會剿車臣汗部札薩克巴雅爾什第偕達爾濟雅馳赴布拉罕路擊斬台拉克和濟木呼哩擒阿克珠勒俘其眾以所獲還齊徹布等

詔嘉之晉封巴雅爾什第和碩親王達爾濟雅固山貝子

命巴雅爾什第赴科布多布延圖駐防達爾濟雅由都固稜赴索勒畢烏拉克沁駐防時包沁餘賊有竄伏烏隆諸界者達爾濟雅偕副都統札爾杭阿等以兵千餘由阿爾台烏蘭嶺分捕至額爾齊斯庫克托輝盡擒之

布庫努特宰桑敦多克曼集等附逆車木楚克札布偕
台吉唐古特追擊之誅其眾復乘勝與旺布多爾濟、剿
叛黨阿巴噶斯哈丹等游牧。

詔嘉其功

賜三眼孔雀翎

諭隨策楞由博囉塔拉復赴伊犁九月

諭青袞咱卜率烏梁海兵隨參贊大臣哈達哈剿阿逆
青袞咱卜請選兵五萬俟來歲進剿

諭曰前聞青袞咱卜諸事迎合阿逆曾降旨擒治念其
情尙可恕旋諭停止以觀後效今詢阿逆屬人供稱青

哀咱卜實有以班第薩拉爾參奏之處。通信阿逆伊旣從中漏洩。則聞其叛遁心必惶懼。現今所請派兵追剿之說。不過藉此姑延時日。著傳諭哈達哈遵前旨擒解來京。方大軍之剿達瓦齊也。青衰咱卜與阿逆同隊。交甚暱。定北將軍班第與參贊大臣薩拉爾密奏阿睦爾撒納逆狀。青衰咱卜微聞之私以相告。阿逆旣叛。青衰咱卜潛遣烏梁海人諾爾布丹津赴阿逆所。至是事發。故有擒解之命。未幾。

上追念其招撫烏梁海功。

宥弗究。會烏梁海賊郭勒卓輝博博等僞傳阿逆煽哈

薩克阿布賚汗入寇仍

命青袞咱卜以參贊大臣隨哈達哈進剿。

命旺布多爾濟隨定西將軍策楞由博囉塔拉進剿阿逆。

賜孔雀翎。

皇朝藩部要略卷之七

前史官壽陽 祁韻士 簇

寶山 毛嶽生 編次

江陰 宋景昌 校寫

平定 張 穆 覆審

外蒙古喀爾喀部要略五

二十一年春達爾濟雅偕塔爾瑪善等踰阿爾台剿阿逆至布拉罕察罕托輝偵知和碩特訥默庫叛分兵屯和通鄂博哈布塔之伯爾克蘇伯口訥默庫就擒還屯塔密爾四月車木楚克札布自伊犁縛獻阿巴噶斯哈

丹戚屬請駐巴里坤剿逆賊。

諭曰爾等自去歲效力軍營往返勞頓今不過弋捕逸犯毋庸多人可歸游牧休息。

命復格塔克木不勒札薩克輔國公爵。

賜雙眼孔雀翎並遣歸牧與德木楚克會緝劫賊。

詔車布登札布以參贊大臣隨哈達哈率師剿哈薩克有固爾班和卓者奇爾吉斯宰桑也攜千餘戶潛赴烏梁海車布登札布車登三不勒等邀擒之因進兵哈薩克界五月達爾濟雅納木札勒齊蘇嚙等由海喇蘭伯勒齊爾旺剿烏梁海之倡亂者追至庫楚克及哈達什

伯根斬獲甚眾車布登札布達爾濟雅等迎會哈達哈大軍于哈什拉克謀哈薩克賊千餘由巴顏山遁偕土謝圖汗部台吉三都市多爾濟追至伊什勒郭爾及烏拉罕布木巴汗札爾會掩擊之斬獲無算

上嘉車布登札布功晉封多羅郡王大軍抵烏梁海青袞咱卜私攜所部兵還牧構逆且遣赴烏里雅蘇台軍燭眾喀爾喀令散歸輝特逆賊普爾普德濟特等由固都爾格叛逃齊巴克札布追擒之復隨參贊大臣納穆札爾捕烏梁海逃眾至阿固特賊逸尾擊之歿于陣事聞

諭曰齊巴克札布歿于行陣深堪嘉憫著追封輔國公賜銀三百兩治喪視一品大臣例賜祭葬入祀昭忠祠其子巴圖濟爾噶勒襲爵并授札薩克

詔貢楚克札布由翁吉達什和碩解內札薩克馬納烏里雅蘇台自青袞咱卜屢干重譴

上不忍置之法

恩宥者三至是叛蹟顯著不可復逭

諭廷臣曰青袞咱卜受朕恩最深去歲將軍大臣叅奏阿逆伊敢私自漏洩百計趨承以致阿逆趾高氣揚肆行無忌後于追緝之時觀望退縮妄言必得兩路出師

五萬方可追擒種種乖謬指不勝屈前此屢欲擒治念伊祖博貝夙著勤勞施恩寬宥今無故自軍營擅歸又揚言額璘沁多爾濟達木巴札布等治罪之後眾心疑惑而喀爾喀數年以來皆以用兵爲累以其怨望之私托爲他人之說妄行瀆奏藐法已極斷難姑容必當明正典刑以示懲戒著傳諭舒明阿蘭泰如已歸游牧可諭哈達哈等旋師往剿如至舒明所駐地方卽降旨擒解青袞咱卜之叛造僞符撤汎兵眾札薩克多爲所惑延不勒多爾濟子旺沁多爾濟等並棄汎歸牧土謝圖汗部貝勒達什不勒亦慮所屬游牧被掠由烏里雅蘇

台軍營私歸尋覺其詐督兵往護臺汎獨桑齋多爾濟飭所屬安伍察獲台吉阿雅喇所匿僞符札薩克圖汗部台吉遜篤布與車臣汗部札薩克台吉成袞札布亦察其詐安堵如故初遜篤布等以檄由德沁札布所至疑與青袞咱卜通以聞

諭曰僞檄流傳或係他人假冒德沁札布之名亦未可定著加恩免究飭令速歸舊汎接理驛務毋自貽悞遜篤布督兵嚴守各汎誓以死拒事聞

諭曰喀爾喀王公等爲青袞咱卜所煽多擅離職守遜篤布等特一札薩克台吉耳獨明大義不冒附逆誓死

效力朕甚嘉之。

賜公品級以示獎勵。

詔獎桑齊多爾濟之能授北路參贊大臣。

命往諭烏梁海總管赤倫協擒青袞咱卜土謝圖汗部貝勒達什不勒復許德沁札布所屬乘閒劫馬。

詔速擒賊贖罪車布登將以兵會參贊大臣塔爾瑪善赴烏蘭嶺追阿逆未至遽由納林喀喇歸牧塔爾瑪善以聞。

諭曰車布登係喀爾喀舊人受恩最爲深重今乃擅棄職守私行逃歸情甚可惡著擒解來京治罪以賽因諾

顏部札薩克台吉喇布坦齊充札布額琳沁台吉旺舒
克多爾濟守護汎地督牧如故並

賜孔雀翎

命給牧夫口糧示獎自諸札薩克乘汎後驛路中梗軍
書旁午不得達經過官吏輒遇害車木楚克札布督兵
續遞同部三等台吉噶瓦供給牲畜爲之護送且多捐
馬助驛用諸汎之路始通

詔晉封車木楚克札布多羅貝勒

賜噶瓦公品級

諭達什不勒曰昨聞達什不勒私歸游牧朕卽料其不

過爲浮言所惑今果知悔悟率兵接遞驛務前咎不足深責仍加恩晉封郡王品級但驛站旣係新設非加意巡察恐有遲誤著達什丕勒會同總管達松阿等悉心辦理七月宣

諭喀爾喀王公等曰青袞咱卜係獲罪斥革之人復加恩令襲貝勒並授副將軍去歲從征伊犁封授郡王稍有人心自當圖報孰意深負朕恩實出情理之外此次辦理烏梁海授爲參贊予以自新之路伊至烏梁海並未擒獲鄂木布郭勒卓輝等卽撤兵還雖自有哈達哈率兵往剿伊卽退還無關輕重但旣爲參贊並不奏請

諭旨亦未咨報將軍率兵擅還律以軍法罪不容誅且妄造浮言煽惑眾聽其心實不可問試思辦理準噶爾一事原爲喀爾喀經理長久之計命將興師以期一勞永逸然選派爾部官兵俱經賞給錢糧米石購辦牲畜何次不給價值而伊乃以連年用兵爲累是誠何心至軍營賞罰乃國家憲典所必行達木巴札布係管理杜爾伯特游牧之人縱令巴朗遁走諱匿不報額璘沁多爾濟監視阿逆來京明知叛跡已著袖手旁觀致令免脫二人情罪斷無可逭然猶不忍加以顯戮令其自裁此而曲爲寬貸國法何在伊乃謂成吉思汗裔向不治

罪此語舛謬更甚如朕宗室中有犯刑章者朕又何嘗
廢法耶至於稍知奮勉如巴雅爾什第桑齊多爾濟及
車布登札布等則優封顯秩賜資便蕃伊甯不聞之耶
本應除其屬眾削其封爵朕始終眷念舊勳不忍遽令
澌滅所有貝勒爵仍著施恩以額琳沁子輔國公旺布
多爾濟承襲先是眾喀爾喀爲青袞咱卜所煽棄汎私
歸或乘閒肆劫青袞咱卜又分遣其黨誘厄魯特貝子
朋素克公丹拜及烏梁海總管赤倫察達克等與同叛
及聞

諭無不悔悟乞罪七月

詔旺布多爾濟就近擒獻青袞咱卜。

諭曰逆賊青袞咱卜背恩叛逆所襲之爵自不應復令承襲但念此爵本係博貝所襲且效力有年不忍遽削著加恩卽令旺布多爾濟晉襲青袞咱卜所屬盡轄之哈達哈追剿阿逆擒達瓦藏布多爾濟車登始脫歸哈達哈以聞

諭曰去歲伊犁復叛多爾濟車登力弱被擒賊退後他人俱已全歸伊獨弗至朕意其順從阿逆苟且偷生不獨深負國恩實爲眾喀爾喀之辱是以令嚴緝治罪今覽哈達哈奏始知其被賊拘留備經勞瘁甚屬可憫著

加恩復其公爵卽隨哈達哈進征哈薩克協理台吉多爾濟亦還

詔封輔國公多爾濟貢格敦丹近族也八月以車臣汗所屬齊木齊格特人肆竊

命參贊大臣納穆札爾等往緝寘之法

諭札薩克等曰朕因爾等不善經理游牧以致盜賊肆行特命大臣前往督緝念皆起于饑寒復令發帑賑給貧戶以贍生業爾等游牧始皆甯謐恐爾等習于玩愒徒知盜賊已除不復爲貧者籌畫生計又或目前尙知約束日久漸至廢弛當各統率所屬詳察貧困之由俾

謀生有策不至爲非卽有頑悍不悛之徒亦當嚴加約束有犯必懲務令上下安全共享昇平之福延楚布多爾濟不能戢賊乞避居阿巴噶部界

詔喀喇沁部貝子瑚圖靈阿會郡王德木楚克等嚴緝之復

諭廷臣曰齊木齊格特人所居與呼倫貝爾甚近原係延楚布多爾濟屬因伊不能約束妄生事端若不盡行翦除地方何由甯謐著傳諭德木楚克等查出爲首倡亂之人卽正典型餘亦無庸交該札薩克管轄卽賞給喀爾喀曾經效力之人爲奴以示懲儆九月

命成袞札布復爲定邊左副將軍先是青袞咱卜陰謀逆成袞札布首發其狀

獎賜佩飾至是偕德沁札布檄調眾札薩克兵丁協剿復令哲卜尊丹巴呼圖克圖徧諭所部知大義俾勿爲所惑

上嘉之故有是

命并

諭獎德沁札布著交理藩院議敘令速合兵擒剿會哲卜尊丹巴呼圖克圖以青袞咱卜悔罪乞

宥具奏

詔弗許。青袞咱卜奢懼爲擁兵自衛計。脅所屬伊克和託輝特巴罕和託輝特明噶特哈柳沁托斯奢集努特六鄂拓克及烏梁海十六鄂拓克附已。大兵至皆棄去。青袞咱卜攜孥由托濟走斯吉特謀遁俄羅斯。

諭旺布多爾濟爾必無與逆賊同謀之事。朕可深信。昨據貝勒車布登札布屬人告稱逆賊令遷爾游牧。爾雖聽從並非有心附之。今大兵已抵和託輝特爾若能擒獻朕必加重賞。否卽率屬速赴軍營既可永受朕恩。且不墮爾祖博貝舊勳。況青袞咱卜屬人不過脅從若棄之來歸概免治罪。爾其熟思審慮善自爲計毋貽後悔。

丹津來朝。

賜雙眼孔雀翎黃馬褂。

命乾清門行走克什木等就擒齊巴克雅喇木不勒及格塔克木不勒自伊犁還。

諭曰郡王齊巴克雅喇木不勒當逆賊倡亂時能奮勇擊賊馳援班第朕甚嘉之著加恩晉封和碩親王遣歸游牧以示體恤閏九月

授桑齊多爾濟所部副將軍

諭歸游牧嚴緝棄汎肆劫逃兵車木楚克札布解送駝馬助軍

諭軍需項內折價賞給

命副都統濟福赴車臣汗部會汗嘛呢巴達喇緝所部劫賊適嘛呢巴達喇疾濟福以聞

諭曰嘛呢巴達喇年幼不更事今旣染疾無庸俟其會緝伊同族郡王德木楚克現由軍營遣歸游牧著協同辦理青袞咱卜之叛獨嘛呢巴達喇所屬台吉達瑪琳率子塔木楚克約從界無擅離軍汎者

詔諭獎之琳不勒多爾濟自科布多軍營調赴庫倫協理俄羅斯邊事十月成袞札布奏多爾濟車登拏與逆賊同居應令由軍營速歸牧示所屬毋惑

從之冬成袞札布集諸部兵追剿青袞咱卜以車布登擅歸游牧復詭病不從剿青袞咱卜請削爵論死

詔削貝勒宥死復劾齊巴克札布不赴調

詔削公品級

授巴勒達爾爲所部副將軍初青袞咱卜之叛檄杜爾伯特兵赴軍賊揚言將盡擒喀爾喀王公治罪巴勒達爾以游牧密邇和託輝特懼禍私歸

上鑒其無他

詔成袞札布

諭弗疑懼令協剿青袞咱卜遂有是

命十一月成袞札布遣參贊大臣納穆札爾輕騎往追旺布多爾濟亦率兵從至杭哈將噶斯擒青袞咱卜及其子車蘇隆多爾濟齊旺札布巴里械送京師賊平解德沁札布參贊大臣職十二月

諭曰親王成袞札布奉命討罪實心效力迅奏虜功朕甚嘉之著賞杏黃帶封伊第四子占楚布多爾濟爲世子以獎忠勤尋

命占楚布多爾濟代掌札薩克青袞咱卜之叛也其部貝勒車登札布助逆

上命二賊就擒後籍所屬給成袞札布及弟郡王車布

登札布等成袞札布奏和託輝特屬六鄂拓克並烏梁海十六鄂拓克聞大兵至卽解尙知感戴和託輝特輔國公旺布多爾濟係貝勒博貝嫡嗣輔國公多爾濟車登台吉達什朋素克係博貝從子皆未附逆請令轄青袞咱卜屬至車登札布助逆時台吉諾爾布曾經諫沮弗聽乃率眾台吉馳赴烏里雅蘇台軍汎訴世受

國恩誓不從賊因率屬由博羅哈卜齊爾赴察罕托輝游牧供應駝馬亦極奮勉請授札薩克令轄車登札布屬庶伊等不致離析各札薩克知感自必嚴加鉛束詔獎協機宜如議行

二十二年正月青袞咱卜伏誅諸子皆連坐

特旨宥其幼子巴里

諭曰逆賊青袞咱卜親屬理應概予駢誅但念伊祖原封貝勒博貝之妻巴勒津年逾八旬孤苦無依博貝曾著勞績不忍令其絕嗣著加恩令巴里與之同居免其正法以示朕格外優恤至意

詔授賽因諾顏親王成袞札布定邊將軍統大軍赴巴里坤剿輝特逆賊巴雅爾

諭曰將軍重任甚難其人成袞札布熟悉蒙古事宜且深感朕恩誠心報效著授將軍印賜整裝銀五千兩伊

子弟有願隨往者聽其指名具奏此次進兵非初進伊
犁可比現在賊勢窮蹙擒剿甚易成袞札布勤勞已久
毋庸久駐行間以示體恤成袞札布長子一等台吉額
爾克沙喇從剿

詔封輔國公春遣車臣汗部公達爾濟雅歸牧尋
諭偕副都統濟福會緝所部劫賊弼齊罕扣等于色布
蒐勒復由鄂煥郭勒擒賊塔瑚賚

命土謝圖汗部額璘沁多爾濟兄根札布多爾濟復世
爵改爲札薩克固山貝子根札布多爾濟敦多布多爾
濟長子康熙末尙郡主授和碩額駙五月土謝圖親王

桑齊多爾濟獲弁汎兵二十七人寘于法

命徧諭汎兵知之五月授札薩克圖汗貝勒旺布多爾濟副盟長六月旺布多爾濟隨大軍由巴里坤擒準噶爾叛賊呢瑪于阿爾察圖山

諭獎其功

賜郡王品級八月土謝圖汗部公車登三不勒駐防翁固爾諾爾有台吉達瑪琳者其族也附青袞咱卜叛副將軍親王桑齊多爾濟率賽因諾顏郡王車布登札布等奉

詔往擒未至達瑪琳遁車登三不勒偕協理台吉占楚

卜由翁固爾諾爾馳追縛以獻桑齋多爾濟遣兵解赴京師並獲

獎賜車臣汗郡王巴雅爾什第·偵所部劫賊什等竄呼倫貝爾之西墨爾根哈瑪爾偕同部郡王德木楚克公格塔克巴木丕勒等掩擒之置之法敘功加一級

賚幣

賜德木楚克三眼孔雀翎貝子延楚布多爾濟以溺職詔削爵車木楚克札布偕唐喀祿奏言杜爾伯特貝勒巴圖博羅特公舍稜台吉阿喇善等通阿逆走額爾齊斯不從其汗車凌徙牧臣等偵得狀偕副都統瑚爾起

馳赴輝巴郎山後擒巴圖博羅特并剿烏梁海賊五十
戶乃旋兵赴塔爾巴噶台緝哈薩克錫喇

諭嘉其能和衷且協機宜以

御用佩飾賜之飭敘加級秋達爾濟雅扈

駕木蘭行圍授副盟長九月

諭車木楚克札布偕車布登札布招降烏梁海宰桑博
和勒納木札勒等札薩克圖汗部已革輔國公多岳特
單騎赴濟伯拉克堡偵賊爲所窘不屈歸

詔授三等台吉

賜公品級烏梁海內大臣察達克率兵四百往招車木

楚克札布檄布延圖兵百繼進盡降之有特勒伯克札爾納克者阿勒坦諾爾之烏梁海宰桑也聞之亦攜屬至

詔車木楚克札布定貢賞例宣示德意九月車布登札布請遣烏梁海大臣察達克率兵四百往招烏梁海博和勒納木札勒等復由布延圖軍選兵策應

上諭其議十月

諭曰車布登札布辦理軍務皆合機宜較前大有進益明歲進兵著授兆惠爲定邊將軍代成袞札布而以車布登札布爲之副卽來京請訓喀爾喀王公內有能協

同辦事之人伊卽指名具奏毋庸派兵但將親隨人役酌量足用仍加恩賞銀二千兩以備整裝之用成袞札布世子占楚布多爾濟卒

命其長子輔國公額爾克沙喇代掌札薩克

詔賽因諾顏親王德沁札布購馬解軍同部貝子諾爾布札布獻馬助軍得紀錄尋

賜雙眼孔雀翎一等台吉公品級齊旺多爾濟以病不能赴軍請獻馬五百免給值

上嘉其誠

賜貝子品級十一月旺布多爾濟卒于軍士謝圖汗部

一等台吉三濟札布亦以疾卒成袞札布以聞

諭曰旺布多爾濟及三濟札布久駐軍營匪勉行走前
曾降旨令歸牧休息今已溘逝深堪憫惻著加恩以旺
布多爾濟之子車都布襲貝勒仍賞郡王品級賜銀五
百兩治喪三濟札布之一等台吉亦令伊子三都布多
爾濟承襲并賞公品級賜銀三百兩治喪車布登札布
奏札薩克圖汗部輔國公彌什克老成練事請遣護杜
爾伯特游牧

從之授札薩克圖汗部輔國公多爾濟車登所部副將
軍參贊

詔札薩克圖汗部一等台吉根敦偕參贊大臣唐喀祿
護侍衛松達納赴哈薩克授札薩克圖汗部二等台吉
達什朋素克札薩一等台吉析青袞咱卜屬

命轄之初青袞咱卜叛馳報烏里雅蘇台軍令設備敘
功故有是命

詔札薩克圖汗部一等台吉諾爾布駐防布延圖額德
格特汎車布登札布奏派土謝圖汗部公品級札薩克
台吉三都布多爾濟一等台吉齊旺札布賽因諾顏部
札薩克台吉達什一等台吉敦多卜四等台吉庫爾奎
等隨征聽調

從之十二月成袞札布來朝。

諭曰成袞札布世篤忠貞夙諳軍旅前曾授定邊左副將軍永居邊陲嗣因巴雅爾作亂授定邊將軍統兵進剿朕思北路軍營關係甚重自平定伊犁以來拓地廣遠統轄匪易今復授爲定邊將軍駐守烏里雅蘇台統領官兵綏柔邊境其最之賽因諾顏部貝子福保自伊犁歸雍正間爲準噶爾所掠至是賊平始得歸

賜公品級先是福保陷賊其兄沙克都爾札布代襲貝子福保貞勤恭格喇布坦第四子十二月

諭曰車木楚克札布數年宣力戎行勤勞懋著近復招

降烏梁海善爲撫納著晉封多羅郡王賽因諾顏部札薩克一等台吉額墨根卒子達什襲是年車臣汗部公格埒克以病罷子貢楚克多爾濟襲以和託輝特逆賊青袞咱卜旣誅

諭札薩克圖汗部諸札薩克曰前因青袞咱卜負恩背叛散布流言眾喀爾喀間有煽動經朕訓諭爾等旋知悔悟各奉職守今逆賊就誅黨附人等應分別治罪以彰國憲但爾等爲國家臣僕百餘年誤聽浮言致干罪戾並非有心附賊免其查究嗣後益宜仰朕恩湔滌前愆約束所屬各安本業紓靜邊隅長享太平之福

二十三年正月

詔授郡王車布登札布定邊右副將軍隨將軍兆惠由巴里坤進剿厄魯特餘賊及逆回霍集占二月土謝圖汗部被災乏食

詔遣都統多爾濟齎銀萬兩賑之土謝圖汗部親王參贊大臣桑齊多爾濟赴庫倫協理俄羅斯邊境事阿睦爾撒納竄斃俄羅斯獻尸至界

詔土謝圖汗部郡王齊巴克雅喇木不勒馳赴恰克圖驗視定邊右副將軍親王車布登札布奉

命進兵哈薩克索叛賊哈薩克錫喇及布庫察罕以土

謝圖汗部札薩克三都布多爾濟數著戎績奏請隨往允之車臣汗嘛呢巴達喇札薩克圖汗部郡王巴勒達爾來朝並

命乾清門行走

賜嘛呢巴達喇三眼孔雀翎黃馬褂及紫鸞尋偕桑齊多爾濟緝獲劫賊阿弼斯瑚等

賚幣三月

賜定邊左副將軍親王成袞札布銀千兩

命攜孥赴軍車布登札布率兵至伊犁時叛酋阿睦爾撒納竄死逸賊阿巴噶斯哈丹舍稜布庫察罕哈薩克

錫喇等未就擒車布登札布奏遣兵赴哈什崆格斯搜逸賊

諭曰此等處所伊犁進兵時俱已經過何必重勞馬力現今阿巴噶斯哈丹及舍稜等俱未殲除殊屬不知緩急伊等當自知愧悟益加奮勉車布登札布奏請赴塔爾巴噶台偵緝舍稜

諭曰當舍稜初遁時伊等若卽尾追又有和碩齊堵截必爲擒獲今已逋逃兩月餘豈尙在塔爾巴噶台坐待追兵耶可速赴額爾齊斯與成袞札布等協力會剿尋諭赴博羅塔拉緝阿巴噶斯哈丹布庫察罕哈薩克錫

喇毋庸復至額爾齊斯車木楚克札布奏借察達克勘烏梁海戶口其得秦有十餘戶二十餘戶不等分置得木齊收楞額等員請并戶少者約四十戶編得秦一上知其悉烏梁海情

詔如所請四月車布登札布率賽因諾顏一等台吉達什等至伊犁捕厄魯特餘賊以土爾扈特台吉舍稜遁俄羅斯

詔成袞札布赴科布多會剿時成袞札布已領兵三百赴布延圖追剿奏至

諭獎之夏三都布多爾濟偕侍衛庫爾圖率五十騎爲

大軍導至和落霍斯。偵賊據高岡夾擊之。賊棄岡遁。追剿至昭達里克。賊眾盡降。馳疏告捷。

賜孔雀翎凱旋。以土爾扈特台吉舍稜勞章札卜等叛逃。偕副都統鄂博什引兵百馳追之。至伊蘭博羅特圖喇。偵竄俄羅斯。乃還。烏梁海總管阿拉善。攜戶百餘叛逃。賽因諾顏部郡王品級車木楚克札布。率札薩克圖部公多岳特追擒。有車根者。亦烏梁海總管也。縛獻阿拉善。收其眾。烏梁海人恩克叛逃。

命成袞札布調諸部兵擒獲。並

賜銀幣尋

諭札薩克圖部公多爾濟車登偕參贊大臣福祿緝烏
梁海劫賊布爾古特布格等擒之並蒙

獎賚時烏梁海賊阿木古朗等劫馬札薩克圖部札薩
克達什朋素克護所屬福祿劾之

詔削札薩克留軍效力尋隨福保追擒阿木古朗等寘
于法

詔宥前罪仍授札薩克靖逆將軍雅爾哈善剿庫車逆
回札薩克圖部一等台吉朗袞札布偕台吉額琳沁率
兵八百繼進由巴掄沙札爾至積噶托果納擊賊援兵
斬獲甚眾

諭嘉之封輔國公尋克庫車朗袞札布邀擊逃賊無脫者復隨定邊將軍兆惠進師葉爾羌至呼爾滿擊賊敗之

晉封鎮國公

賜雙眼孔雀翎定邊左副將軍親王成袞札布劾札薩克圖汗部一等台吉根敦緝盜馬賊弗獲

詔奪俸時賽因諾顏參贊大臣親王德沁札布緝獲盜馬賊瑪塔克加級

賚幣六月車布登札布奏收服烏魯特得木齊托羅和卓六十餘戶于哈什河

諭卽策應光惠會布庫察罕爲哈薩克部人察哈瑪巴圖爾所擒。

諭曰前諭車布登札布不必往追舍稜俟擒布庫察罕等卽策應光惠今聞布庫察罕見擒于哈薩克則哈薩克錫喇亦必竄伏其地車布登札布速由塔爾巴噶台檄諭哈薩克阿布賚汗將哈薩克錫喇一體擒獻先是哈薩克錫喇及宰桑鄂哲特等潛遁和落霍斯聞追急度不得脫悉眾據高岡侍衛瑪琥等以我兵少請待其走攻之車布登札布持不可麾兵進擊擒鄂哲特哈薩克錫喇僅以身免斬獲甚眾捷聞

詔以其父超勇號賜之。

賜達什公品級。

命車木楚克札布護理盟長印偕親王成袞札布剿詭降之土爾扈特台吉舍稜，僨遁俄羅斯，乃還。七月鄂哲特械至，供稱副將軍車布登札布身先士卒，所向無前，上愈嘉歎。

賜金黃帶。

諭曰：車布登札布奮勇剿賊，以少克敵，不愧超勇之目。前者舍稜逃遁，伊未及尾追，諒因不能兼顧，亦事勢使然。此時布庫察罕料哈薩克自必縛獻，惟聞哈薩克錫

喇逃西哈薩克部之特柳克參贊大臣富德兵少窮追似屬可虞昨諭車布登札布策應自應前往但亦須酌量馬力儻有不足卽撤兵與富德暫回伊犁再圖進取朕於他人每降旨督催伊天性勇往故降此旨著傳諭知之是月車布登札布由固爾班察爾進屯阿布勒噶爾哈薩克縛獻布庫察罕車布登札布因請馳赴阿克蘇策應將軍兆惠

命還駐伊犁晉親王品級八月車布登來朝

諭曰原封貝勒車布登係附和逆賊青袞咱卜之人原應按律治罪朕因其平日爲人愚昧又年老可矜從寬

祇令削爵仍許其子承襲輔國公伊悔罪感恩抒誠入觀念前此曾經宣力積有勤勞著加恩賜公品級遣歸游牧九月

諭曰撫定回部已有兆惠納穆札爾等自易竣事車布登札布軍營效力已久撤兵後卽歸游牧休息烏梁海總管阿拉善恩克等叛竄車木楚克札布偕札薩克圖汗部公品級多岳特分剿阿拉善及恩克屬就擒謀恩克竄哈屯河蹤請暫歸阿勒和碩屯駐冬雪後賊必就擒

許之十二月成袞札布奉

詔賜駝馬解巴里坤。

授三都布多爾濟所部副將軍參贊協理俄羅斯邊境事尋署副將軍以擒獲厄魯特逃賊珠卓木等。

賚幣車木楚克札布果擒恩克。

賚幣是年土謝圖汗延不勒多爾濟卒從子車登多爾濟襲。